

В ПОНЕДЕЛЬНИК 5-Я СЕДМИЦЫ ВЕЧЕРА,

стихословим вместо, Ко Господу: рядовую кафисму Псалтира, сиесть, 10-ю.

На Господи воззвах, поставим стихов 6: и поем подобны 3, и Миней 3.

Стихиры подобны трипеснца, господина Иосифа, глас 3.

Подобен: Крестоявленно:

Давый нам пощения время обратитися * и живым быти, и никакоже погибнути, Слове Божий, * сподоби всех благоугодити Тебе добре, * и теплым умилением послужити Тебе Христе, * якоже блудница оная целомудренная и честная, * иногда миром и излиянными теплых слез, * прегрешений приимши оставление.

Якоже слепый от сердца зову Ти: * Сыне Божий, просвети мои очи сердечныя. * Якоже верная хананеа вопию Ти: * помилуй мя Щедре, ибо душу беснующуюся имам в сластех: * юже пременив от тьмы страстей, * прочее жити чисте сотвори, * да славаю Твою многую благостыню.

Иный, господина Феодора, глас 8.

Подобен: Богозванный мученик:

Богосветлая благодать воздержания, * возсиявши нам днесь солнца светлее, * души наша просвещает, * якоже облаки страсти греховныя отгоняющи. * Сего ради вси притецем, * благодушно сию лобызающе: * радуящиеся совершаем божественное поприще того, * егоже в веселиих учреждающесе возопиим Христу: * освяти Блаже, сие совершающия верно.

И Миней 3. Слава, и ныне, Богородичен.

Прокимен, псалом 85, глас 4: Настави мя Господи на путь Твой, и пойду во истине Твоей.

Стих: Приклони Господи ухо Твое.

Бытия чтение. [Глава 13 ст. 12 – 18.]

Аврам же вселися в земли Ханаанстей: Лот же вселися во граде окрестных стран, и вселися в Содоме. Человецы же сущии в Содоме зли, и грешни пред Богом зело. Бог же рече Авраму, повнегда разлучитися Лоту от него: воззри очима твоима, и виждь от места, идеже ты ныне еси, к северу, и ливе {югу}, и к востоку, и морю. Яко всю землю, юже ты видиши, тебе дам ю, и семени твоему во веки. И сотворю семя твое яко песок земный: аще кто может исчести песок земный, то и семя твое изочтет. Востав пройди землю в долготу ея, и в широту, яко тебе дам ю, и семени твоему во век. И отселився Аврам, пришед вселися у дуба Мамврийскаго, иже бяше в Хевроне: и созда ту жертвенник Господу.

Прокимен, псалом 86, глас 4: Любит Господь врата Сионя, паче всех селений Иаковлих.

Стих: Основания его на горах святых.

Притчей чтение. [Глава 14, ст. 27 – 35. Глава 15 ст. 1 – 4.]

Страх Господень источник жизни, творит же уклонятися от сети смертныя. Во мнозе языке слава царю: во оскудении же людсте сокрушение сильному. Долготерпелив муж, мног в разуме: малодушный же крепко безумен. Кроткий муж

сердцу врач: моль же костем сердце чувственно. Оклеветай убогаго, раздражает Сотворшаго и: почитай же Его, милует нищаго. Во злобе своей отринется нечестивый: надей же ся на Господа, своим преподобием праведен. В сердце блазе мужа почует премудрость: в сердца же безумных не познавается. Правда возвышает язык, умаляют же племена греси. Приятен цареви слуга разумный: своим же благообращением отъемлет безчестие. Гнев губит и разумныя: ответ же смирен отвращает ярость, а слово жестоко воздвизает гнев. Язык мудрых добрая свесть: уста же безумных возвепают злая. На всяком месте очи Господни сматряют злыя же и благия. Исцеление языка древо жизни: храний же его, исполнится духа.

На стиховне самогласен, глас 7, единожды:

Якоже впадый в разбойники и уязвен, * тако и аз впадох от моих грехов, * и уязвена есть душа моя: * к кому прибегну исцелиться? * токмо к Тебе душ же и телес врачу: * излей на мя Боже * великую Твою милость.

Иный самогласен, единожды, глас 4:

Прегрешивше от преступления перваго, * от райския сладости и наслаждения * ведени быхом в безчестнейшую жизнь: * добродетелей бо подобающаго и хвальнаго жития совлекшеся прегрешеньми, * яко в разбойники впадохом: * исполу же мертвы есмы, прегрешивше от спасительных учений Твоих, * но молим Тя от Марии явившагося, * и безстрастно стражем приближившагося Владыку: * обяжи наша яже от греха прибывшия струпы, * и безмерное Твое милосердие изливай на ны, * Твое исцелительное попечение, яко Человеколюбец.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Прегрешивше от преступления перваго, * от райския сладости и наслаждения * ведени быхом в безчестнейшую жизнь: * добродетелей бо подобающаго и хвальнаго жития совлекшеся прегрешеньми, * яко в разбойники впадохом: * исполу же мертвы есмы, прегрешивше от спасительных учений Твоих, * но молим Тя от Марии явившагося, * и безстрастно стражем приближившагося Владыку: * обяжи наша яже от греха прибывшия струпы, * и безмерное Твое милосердие изливай на ны, * Твое исцелительное попечение, яко Человеколюбец.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

Мученичен: Святых мученик приемый терпение, * и от нас прими пение Человеколюбче, * даруя нам тех молитвами * велию милость.

Слава, и ныне, Богородичен:

От всех бед рабы Твоя сохраняй, * благословенная Богородице: * да Тя славим * надежду душ наших.

Во Вторник 5-я седмицы

На Утрени Троичны

Таже стихологисуем кафисму 11, 12, 13. По 1-м стихословии глаголем седальны умилительныя Осмогласника 2, с Богородичным.

По 2-м же стихословии седален господина Иосифа, глас 3.

Подобен: Божественныя веры:

Теплотою веры, воздержанием страсти попалим невоздержания, * и пропасти греха убежим, * и слезными токи погасим вечнующий пламень, зовуще: * Преблагий, согрешихом Ти, очисти, * и даруй нам велию милость. [Дважды.]

Богородичен. Подобен:

Божественная была еси скиния Слова, * едина Всечистая Дево Мати, * чистотою ангелы превозшедшая, * мене паче всех персть бывша осквернена плотскими согрешеньми * очисти молитвами Твоими, * Божественною водою, * подающи Чистая, велию милость.

По 3-м стихословии, седален господина Феодора, глас 2.

Подобен: Препоблагословенна еси:

Препрославленная благодать всечестнаго поста, * имже Илия пророк обретает колесницу огненную, * и Моисей скрижали приемлет, * Даниил же чудный бысть, * Елисей мертвого воздвиже, * отроцы же огонь угасиша, и всяк кто к Богу присвоися. * Тем питающесе возопиим: * благословен Христос Бог наш, тако благоволивый, слава Тебе. [Дважды.]

Слава, и ныне, Богородичен:

Подобен: Пречистому:

Необоримую молитву Твою стяжав в лютых, * избавляюся от оскорбляющих мя паче надежды чудно, о Мати Божия! * Ускоряеши бо всегда просящим Тя верно, * и разрешаеши содержимая искушения. * Тем благодарственно вопию Ти: * приими Владычице краткая благодарственная, * вместо их еси мне во всех Дево помощи.

Канон в Минеи, и настоящий трипеснец, господина Иосифа.

И стихословится песнь. Глас 3.

Песнь 2.

Ирмос: Вонми земле и небо, * и внуши глаголы моя, * возглаголю бо на земли * Божия чудеса.

Непрестанными молитвами, и воздержанием и видением вперим души к Божественному желанию.

Невоздержания стремнины убежавше, уяснимся вси воздержания светом в Божественном Дусе.

Солию божественных добродетелей, гноение греховное отложивши душе, Богу прилепися.

Богородичен: Упокоися Христос в Тебе единой Благословенной, и плоть Свою от Тебе понесе.

Иный, глас 2.

Ирмос: **Внемлите людие знаменем * дел Божественных Моя сила, * и о сем уразумеите, * яко един Аз Бог есмь всех.**

Пощение чистое, молитвы, слезы, поучение Божественных и всякую иную добродетель совокупивше, Владыце Христу ныне принесем.

Ева пленена бысть плодом: виждь ты душе моя, не прельщайся, аще приложит тебе змий когда совещаи, ясти тебе сластных плоды.

Троицен: **Три** единого зрака Лица славлю, Отца, Сына и Духа, едину державу Божества, Царство всех, и Божество.

Богородичен: **Рождество** Твое Чистая страшно бысть: Бог бо есть вочеловечивыйся безначально от Отца рождейся, и из Тебе в последняя без мужа родивыйся.

Слава Тебе Боже наш, слава Тебе.

Кровоточивую, осязанием омет Твоих исцелил еси Христе мой, и мене верою милости Твоя прикасающагося, здрава от страстей учини.

Катавасия: **Внемлите людие знаменем * дел Божественных Моя сила, * и о сем уразумеите, * яко един Аз Бог есмь всех.**

Песнь 8.

Ирмос: **Ангельми немолчно ...,**

В тайне ловя по вся дни вселукавый, ищет мя пояти и снедь сотворити: того мя злобы избави Спасе, спасый Иону от кита.

Пощением очистившися, на гору добродетелей взыдем, и услышим ясно, что возглаголет в нас Бог: возглаголет бо мир и просвещение, и исцеление душевных сокрушений.

Греховным омрачением всегда ослепляемь, не могу разумети чудеса Твоя Господи: темже мои сердечныя очи отверзи, Иисусе Светодавче.

Богородичен: **Щедрот** Твоих окропленьми, Приснодево Нескверная, осквернения страстная сердца моего отмый, слез токи, чистоты мне подательныя очищения душевнаго, дарующи.

Иный.

Ирмос: **Древле оросившаго еврейския отроки * в пламени, и опалившаго Господа * халдеи преславно в нем, * воспоем глаголюще: * благословите и превозносите Его во веки.**

Огнь не угасает, и червь, рече, не скончится, убойся прещения, о душе моя, угождающи Христу! Да обрящещи наслаждение, идеже всем есть веселящимся жилище.

Опалением разжигаемую душу мою похотений, возстави Господи, молюся, осязанием Твоим, якоже Петрову тещу, да обрящется работати Тебе благоугодно, исповедающися во вся веки.

Благословим Отца, и Сына, и Святаго Духа, Господа.

Троицен: Присносущнаго безначальнаго Отца воспоем вернии, Сына же собезначальна, и Духа сопросиявша из Отца, единосущна Лица, единого суца всесильнаго начала, и власти.

Богородичен: Марие Богозванная, очищение воистинну верных, из Тебе бо оставление подавается всем богато: Сына Твоего и Господа не престай умоляющи о поющих Тя.

Слава Тебе Боже наш, слава Тебе.

Уши отверзи души моя оглохнувшия Христе, и язык мой уясни, якоже древле гутниваго и глухаго: да внушая Твоим гласовом пою, и языком хвалю Тя во веки.

Хвалим, благословим, покланяемся Господеви, поюще и превозносяще во вся веки.

Катавасия: Древле оросившаго еврейския отроки * в пламени, и опалившаго Господа * халдеи преславно в нем, * воспоем глаголюще: * благословите и превозносите Его во веки.

Песнь 9.

Ирмос: Тебе неопалимую:

Пламень огня негасимаго во уме стяжавше, теплою мыслию, покаяния огню ныне приступим, страсти опаляюще.

Уст постящихся древле, разжигаемое слово, изшедшее ревнительне, преклоняет составы: сему ревнуй душе, и добре поживи.

Судище страшное помышляющи, всеокаянная душе моя, шествия твоя присно, ко исполнению хотений Избавителя уготовляй.

Богородичен: Омраченную душу мою сластей очернением, просвети Чистая, Свет рождающая: да любовию и верою присно величаю Тя.

Иный.

Ирмос: Преестественно плотию * заченшую во чреве, * от Отца безлетно предвозсиявшее Слово, * в песнях немолчных величаем вернии.

Уд весь плоти наша представи Христу, оружия правды: рече, рече, воздевши преподобныя без гнева и размышлений.

Ты иногда учеником в корабли представ, оставил еси Христе мой неистовствующее море, и моя треволнения утиши помышлений.

Троицен: Единому Естеству покланяюся, три Лица пою, единого Бога всех, Отца, и Сына, и Святаго Духа, присносущное начало.

Богородичен: Чистая детотвориши, Дева млеко питаеши, како в томже обоя девствуеши раждающи? Бог есть сотворивый, не вопрошай Мене, како.

Слава Тебе Боже наш, слава Тебе.

От разбойнических мя страстей осквернена душею, исцели Христе мой, изливая Твою милость, якоже впадшему в рече разбойников.

Ирмос: Преестественно плотию * заченшую во чреве, * от Отца безлетно предвозсиявшее Слово, * в песнях немолчных величаем вернии.

Светилен гласа.

На стиховне самогласен дне, дважды, глас 7:

Уязвенную мою душу, * и смиренную посети Господи, * врачу болящих и отчаянных, * пристанище необуреваемое: * Ты бо еси пришедый Избавитель мира, * еже воздвигнути из тли падшаго: * и мене припадающа возстави, * за великую Твою милость.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Уязвенную мою душу ...,

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Посреде судища законопреступных, * радующесе вопияху стратотерпцы: * Господи слава Тебе.

Слава, и ныне, Богородичен:

Поем Тя Пречистая Богородице, * и славим Егоже родила еси Бога Слова, зовуще: * слава Тебе.

На 1-м часе, стихологисуем кафисму 14. На 3-м часе, 15. На 6-м часе 16.

НА 6-М ЖЕ ЧАСЕ,

Тропарь Пророчества, Глас 3.

Заступник наш Бог Иаковль, * и Защититель есть в день печали.

Прокимен, псалом 87, глас 6: Нищ есмь аз, и в трудах от юности моя.

Стих: Господи Боже спасения моего, во дни возвах, и в нощи пред Тобою.

Пророчества Исаиина чтение. [Глава 40, ст. 18 – 31.]

Тако глаголет Господь: кому уподобисте Господа, и коему подобию уподобисте Его? Еда образ сотвори древоделатель, или златарь сливав золото позлати его, или подобием сотвори его? Древо бо негниющее избирает древоделатель, и мудре ищет, како поставит образ его, и да не поколеблется. Не разуместе ли, не слышасте ли? не возвестися ли вам исперва? не разуместе ли основания земли, Содержай круг земли, и живуция на ней аки пруги: поставивый небо яко камару, и простер е, яко скинию обитати. Даяй князи, аки ничтоже, владети, и землю, аки ничтоже сотвори. Не насадят бо, ниже насеют, и не вкоренятся в земли корение их: дхне на них ветер, и изскоша, и буря аки стеблие возмет их. Ныне убо кому Мя уподобисте, и вознесуся, рече Святыи? Воззрите на высоту очима вашима, и видите, Кто сотвори сия вся? носяй по числу утварь Свою, и вся по имени прозовет от многия славы, и в державе крепости Своя ничтоже утаися от тебе. Еда бо речеши Иакове, и что глагола еси Израилю? утаися путь мой от Бога, и Бог мой суд отъя и отступи. И ныне не уразумел ли еси? ни ли слышал еси? Бог вечный, Бог устроивый концы земли, не взалчет, ниже утрудится, ниже есть изобретение премудрости Его. Даяй алчущим крепость, и неболезненным печаль. Взалчут бо юнейшии, и утрудятся юноты, и избраннии не крепцы будут: Терпящии же Господа изменят крепость.

Прокимен, псалом 88, глас 6: Блажени людие ведуции воскликновение.

Стих: Господи, во свете лица Твоего пойдем.

На 9-м часе кафисму 18.